

Noticia  
Transparente  
di Gobierno

# ISLA ONLINE

Dialuna 4 Maart 2024

Email: [IslaOnline@gobierno.aw](mailto:IslaOnline@gobierno.aw) Tel: 528-4952

ARTE DI MURAYA  
SAN NICOLAS



**STABILIDAD  
Y  
PROSPERIDAD**  
2 0 2 4



**Gabinete Wever-Croes**





**Reunionnan na Hulanda a cuminsa:**

## **PROME MINISTER, MINISTER DI ECONOMIA Y MINISTER PLENIPOTENCIARIO A REUNI CU SECRATARIO DI ESTADO VAN HUFFELEN**



Prome Minister Evelyn Wever-Croes despues di e conferencia di 'Overseas Countries and Territories Association (OCTA) cu a tuma luga na Bruselas cu siman pasa, na unda cu el a tuma e encargo di Presidente di Octa pa e aña aki, a regresa Hulanda pa diferente reunion entre otro cu Premier Mark Rutte, Secretario di Estado Alexandra van Huffelen, Minister Rob Jetten, y cu Eerste Kamer y Tweede Kamer.

Diabierna prome di maart, Prome Minister, Minister di Economia Geoffrey Wever y Minister Plenipotenciario Ady Thijsen a reuni cu Secretario di Estado Alexandra van Huffelen. Aruba ta na mesa di negosacion riba e tema di e refinanciamiento di debe y ta sigui traha riba esaki. Prome Minister a indica cu ainda tin algun informacion cu Gobierno mester busca pa asina sigui conbersacionnan riba e tema den e dianan venidero. Importante ta, Prome Minister a expresa, cu Gobierno di Aruba ta na mesa y ta purbando di sali afo pa baha e interes di 6.9%



cu Aruba mester bay paga riba e debe di Covid. Secretario di Estado van Huffelen lo bishita Aruba dia 20 di maart proximo pa diferente reunion y Gobierno lo continua cu e reunion riba e tema di debe di Covid cu e Secretario di Estado.



**Prome Minister Evelyn Wever-Croes:**

## **PROME MINISTER A ATENDE FORUM Y REUNION TRILATERAL NA EUROPEAN COMMISSION NA BRUSELAS**

**Paisnan presente a keda satisfecho cu Aruba su maneho riba cambio climatico**

Diahuebs 29 di februari, e delegacion di Aruba cu ta na Bruselas pa e Ministerial Conference OCTA 2024 a atende un forum na e European Commission. Pa e forum aki Aruba tawata representa pa Prome Minister Evelyn Wever-Croes.

Aki nan a reuni e 13 paisnan cu ta forma parti di OCTA hunto cu e paisnan miembro di Union Europeo, Hulanda, Francia y Dinamarca. Durante e forum aki cu a trata diferente tema importante y tambe a tuma luga un reunion trilateral. E reunion aki tawata entre e 6 islanan di OCTA Hulandes; Aruba, Corsou, Boneiro, Saba, Sint Eustatius y Sint Maarten, Hulanda y e European Commission. Pa Hulanda tawata presente Secretario di Estado Alexandra van Huffelen.

Durante e reunion aki tawata tin un interes grandi den e maneho y vision di Aruba riba e tereno di energia. Akinan Prome Minister Evelyn Wever-Croes a duna un splicacion amplio riba e maneho cu Aruba tin pa loke ta trata e cambio climatico. Aruba tin un council cu ta atende cu cambio climatico y pa esaki a alinea tur stakeholder na Aruba den un National Energy Policy. Esaki a keda cla un par di aña pasa durante Gabinete Wever-Croes I tempo Prome Minister tawata tin e cartera di Energia y cu e actual Minister di Energia Glenbert Croes a sigui cu n'e y ya esaki ta den practica.

Prome Minister a sigui profundisa riba e maneho di e cambio climatico y a informa esnan presente cu e meta ta pa na aña 2030 Aruba ta depende solamente 50% riba crudo y 50% riba energia mas limpi. E intencion ta pa transiciona di energia a traves di gas LNG y despues yega na e situacion ideal di hidrogeno. Prome Minister tambe a splica durante e reunion cu Aruba ta tene su mes na palabracionnan di e Acuerdo di Paris apesar cu Aruba no ta un pais ratifica pa esaki. Aruba ta spera cu paisnan grandi cu ta susha hopi mas tambe ta tene nan mes na e acuerdo aki. Prome Minister tambe a informa riba e echo cu na aña 2023 hunto cu Hulanda, a organisa e prome Caribbean Energy and Climate Conference na Aruba, esaki den colaboracion cu Minister di Energia di Hulanda Rob Jetten y Minister di Energia Glenbert Croes.

E paisnan presente a keda hopi satisfecho cu e informacion y splicacion ricibi di Prome Minister riba e maneho di e reto grandi cu ta e cambio climatico y e transicion pa energia mas limpi y akinan Prome Minister a remarca cu esaki ta un compromiso cu tur pais a haci y awor mester cumpli cun'e pa asina atende mihor cu e medio ambiente y baha e uso di e heavy fuel oil. Otro paisnan a papia di otro tipo di retonan cu nan tin pero e tema di energia ta algo cu constantemente a bin dilanti.





**Prome Minister Evelyn Wever-Croes:**

## **PROME MINISTER A ATENDE VARIOS REUNION IMPORTANTE NA ARUBAHUIS**

**A presenta e Relato Anual 2023 y plannan sumamente ambicioso y interesante pa año 2024**



Despues di e conferencia di OCTA na Bruselas, Prome Minister Evelyn-Wever-Croes actualmente ta na Hulanda pa atende varios reunion. Diabierna ultimo, 1 di maart, Prome Minister a reuni na Arubahuis cu Minister Plenipotenciario Ady Thijsen, cu directora nobo di Arubahuis, señora Jocelin Croes y cu e personal di Arubahuis.

### **ENTREGA DI RELATO ANUAL 2023 Y JAARPLAN 2024**

Durante e reunionnan aki a trata diferente tema cual uno hopi importante tawata e entrega di e Relato Anual 2023, cu e personal completo di Arubahuis a traha riba e contenido unda ta describi tur e trabou y logronan di Kabinet di Aruba durante año 2023. Tambe e personal di Arubahuis a presenta na Prome Minister e Jaarplan 2024, esaki pa cada kwartaal detayadamente y cu plannan sumamente ambicioso y interesante.

### **WEBSITE LO WORDO LANSA PRONTO**

Durante e reunion tambe e personal di Kabinet di Aruba a presenta na Prome Minister e website nobo di Arubahuis unda Prome Minister a keda hopi impresiona cu e contenido amplio di esaki y tur e informacionnan importante cu por haya riba e website aki. E website aki lo wordo lansa durante e dianan venidero.

Prome Minister a menciona cu por mira cu Kabinet di Aruba tin un bon vision y asina por yuda tur nos Arubianonan, specialmente nos studiantenan na Hulanda na e miho manera y tambe por asisti Gobierno na Politiek Den Haag y cu relacionnan den Europa.

### **UN REUNION MASHA AMENO CU STUDIAntenAN**

Tambe Prome Minister tawata tin e oportunidad pa topa cu varios estudiante y asina combersa y defini hunto e miho



manera pa sirbi e interes di cada estudiante. Prome Minister a remarca cu e studiantenan ta hopi motiva y ta un inspiracion pa su persona.

“E reunionnan tawata sumamente positivo y fructifero y a duna resultadonan hopi importante. Mi ta gradici e personal completo di Arubahuis pa e bon y bunita trabou y e studiantenan pa nan asistencia y contribucion”, Prome Minister a finalisa bisando.







## **Prome Minister Evelyn Wever-Croes: Den conexion cu e reunionnan riba e debe di Covid REUNION CU PREMIER MARK RUTTE TABATA UNO POSITIVO**



Dialuna atardi Prome Minister Evelyn Wever-Croes a reuni cu Premier Mark Rutte riba topiconan relevante pa Aruba. Un di e puntonan importante durante e reunion tabata e refinanciamiento di e debe di Covid y e interes halto cu Hulanda a impone riba pais Aruba. Durante su bishita na Hulanda, ya Prome Minister a reuni caba riba e topico aki cu Secretario di Estado Alexandra van Huffelen, y cu señor Marnix van Rij di Ministerio di Finanzas. Ambos, Prome Minister a remarca, di ta dispuesto pa yuda caminda cu por.

Prome Minister a informa Premier Rutte di tur e negociacionnan cu ta andando. Un reunion sumamente importante mirando cu ta Consejo di Minister di Reino mester aproba cualkier palabracion cu wordo haci. Durante e reunion tawata tin hopi interes cerca tur esnan presenta pa scucha di Aruba y su progreso.



"E realidad ta cu Aruba ta bayendo bon, desempleo ta bahando, turismo ta bayendo bon y finanzas tambe ta na orden. Lo unico cu falta, ta purba na yega na un miho palabracion pa cu e interes halto cu Aruba a haya di Hulanda riba e debe di Covid. Pa cu esey, mi tin tur confiansa cu nos lo bay yega na un solucion cu ta na miho interes di pais Aruba", Prome Minister a expresa. ■





## 2024 Festival Un Canto pa Aruba su Himno y Bandera – Categoria Adulto: **MINISTER XIOMARA MADURO TA FELICITA GANADONAN DI FESTIVAL UN CANTO PA ARUBA SU HIMNO Y BANDERA CATEGORIA ADULTO**

**Masha danki na tur cantante, compositor y agrupacion musical**

Diabierna ultimo Aruba a conoce composicionnan nobo dedica na nos Pais Aruba. Riba Plaza Libertador Betico Croes a tuma luga e festival Un Canto pa Aruba su Himno y Bandera. E aña aki a participa un total 11 cantante y un total di 9 agrupacion musical cu a haci e festival uno grandioso y exitoso.

Minister di Cultura tabata presente pa duna sosten y apoyo na tur participante. Na final di e anochi e mandatario tabata tin e honor pa por a entrega premio na e ganador maximo di e festival categoria adulto. E resultado di e festival Un Canto pa Aruba su Himno y su Bandera Adulto 2024 tabata lo siguiente:

### **Ganado di e Festival:**

Edward van der Biezen - Cancion: Con mi por lubida -  
 Compositor: Danilo Vrolijk - Areglista: Jaedrick Croes

### **Segundo Luga di e Festival:**

Karena Maduro - Cancion: Un bon Arubiano - Compositor:  
 Jhon Freddy Tobon Montoya - Areglista: Migo Boss y Igmarr Maduro

### **Tercer Luga di e Festival:**

Shermin y Sherdel Maduro - Cancion: Aruba, mi isla, mi cas -  
 Compositor: Zulaika Geerman - Areglista: Zulaika Geerman.

Minister di Cultura Xiomara Maduro ta gradici y felicita Fundacion Cultural di Festivalnan Folklorico pa organisa un bunita festival di adulto. Danki na tur esnan cu tabata tin tent pa ofrece nos cuminda crioyo, cos dushi y artesanía. Un danki tambe na un y tur cu a coopera pa haci e festival uno exitoso, muy en particular tur participante, musico, compositor, areglista y e publico grandi, danki pa apoya, sostene, biba y engrandece nos cultura. ■■■









## 2024 Festival Un Canto pa Aruba su Himno y Bandera – Categoria Infantil - Hubenil:

# MINISTER XIOMARA MADURO TA FELICITA GANADONAN DI FESTIVAL UN CANTO PA ARUBA SU HIMNO Y BANDERA CATEGORIA INFANTIL Y HUBENIL

### Hopi danki na tur cantante, compositor y agrupacion musical

Diasabra a toca turno na e Festival Un Canto pa Aruba su Himno y Bandera categoria Infantil y Hubenil. Cu un Plaza Libertador Betico Croes yen di publico a tuma luga e festival di nos mucha- y hobennan. Un exitoso y grandioso festival cu a conta cu un participacion di 28 participante y 10 agrupacion musical.

Un biaha mas Minister Xiomara Maduro tabata presente pa brinda sosten y apoyo na tur cantante. Despues cu e resultado tabata conoci, Minister Maduro tabata tin e honor pa por a entrega premio na e ganadonan di e festival. . E resultado di e festival Un Canto pa Aruba su Himno y su Bandera Infantil y Hubenil 2024 tabata lo siguiente:

#### Categoria 4-6 aña:

Ganado absoluto: Mirlaine Vis, Titulo: Den mi truck, Compositor: Veloushka Krozendijk y Areglista Elton Trimon.

Di dos luga: Zilah Geerman, Titulo: Canta cu alegria, Compositor: Jhon Freddy Tobon Montoyay Areglista: Dimitri Frans - Johnny Scharbaay

Di tres luga: Livaya Escalona; Titulo: Ay ban zwaai, Compositor: Erick Escalona y Areglista: Amado Rosina.

#### Categoria 7-9 aña:

Ganado Absoluto: Hailey Koolman, Titulo: Arikok, Compositor: Gino Pannefleky Areglista: Gino Panneflek

Di dos luga: J-Vyôn Besselink, Titulo: Aruba ban planta, Compositor: Lurena Schwengle y Areglista: Rygel Isabella.

Di tres luga: Jaymerson Kelly, Titulo: Muchanan ban goza, Compositor: Jason Kelly y Areglista: Tico Kelly

#### Categoria 10-12 aña:

Ganado Absoluto: Kitai de Jongh, Titulo: Sabi mane' don shoco, Compositor: Zulaika Geerman y Areglista: Zulaika Geerman.

Di dos luga: Ishem Howell, Titulo: Cadushi, siña mi, Compositor: Sidney Simoons y Areglista: Elton Trimon

#### Categoria 13-17 aña:

Ganado Absoluto: Gismery Linarez, Titulo: Si mi bos ta di Dios, Compositor: Lurena Schwengley Areglista: Raul Piar.

Di dos luga: Reanne Ras, Titulo: Sigui e pasonan, Compositor: Jhon Freddy Tobon Montoya y Areglista: Raul Piar.

Di tres luga: Lizienne Webbl, Titulo: Pa bo, Compositor: Lurena Schwengley Areglista: Johnny Scharbaay.

Masha pabien na tur e ganado, finalista, participante, compositor, areglista y mayor pa un grandioso y exitoso



festival. Tambe un pabien y danki na pa organisa e festival infantil y hubenil

Minister di Cultura Xiomara Maduro ta gradici y felicita Comision Promove Cultura pa organisa un bunita festival Infantil y Hubenil. Un bes mas masha danki na tur esnan cu tabata tin tent pa ofrece nos cuminda crioyo, cos dushi y artesanía. Danki tambe na tur cu a coopera pa haci e festival uno exitoso y sin lubida e publico grandi cu a bin pa apoya, sostiene, biba y engrandece nos cultura di Aruba.







# MINISTER XIOMARA MADURO A PASA FELICITA PAPA RIKI CU SU 90 AÑA

Diabierna ultimo Minister Xiomara Maduro a pasa felicita sr. Enrique Werleman, tata di colega Junior Arends, pa su 90 cumpleaños. Tabata un placer pa e mandatario por a comparti un rato alegre cu Papa Riki y su famia y amistadnan.

Minister Maduro ta aprecia e invitacion y ta felicita Papa Riki y tur famia cu e bunita celebracion pa e bendicion di por cumpli un edad asina bunita. Cu Dios por brinda Papa Riki hopi aña mas yena cu bon salud.







## AWE MAINTA HEALTHY LIFESTYLE CENTER A CUMINSA E DI DOS PROGRAMA DI "IMPROVING LIVES TOGETHER"



Awe mainta Healthy Lifestyle Center a cuminsa e di dos programa di "Improving Lives Together". Un programa completamente gratis cu Minister Dangui Oduber a inicia cu su vision di traha na un manera preventivo pa asina logra un Aruba mas saludabel.

Improving Lives Together ta un programa cu tin un duracion di 3 luna den cual un total di 30 cliente ta participa. E programa aki ta ofrece guia di nutricion y movecion intensivo den un forma "community based". Durante e periodo aki e clientenan ta ricbi, banda di consultanan semanalmente na HLC cu e dietistanan, tambe un programa di ehercicio cual ta encera 3 biaha pa siman na un gym na unda nan ta ricbi guia profesional con pa haci movecion na un manera safe y accesibel.

E programa aki ta un colaboracion di Healthy Lifestyle Center Aruba y Club Roy50+, unda e team profesional lo guia tur participante pa nan por sinti nan mes equipa pa por hiba un miho calidad di bida.

Prevencion den salud ta e focus di Ministerio di Salud. E deseo di Minister Dangui Oduber ta pa crea un "movement" pa mas y mas hende participa na programanan y pa asina logra tin un comunidad mas saludabel aki na Aruba.





Minister Dangui Oduber:

DIA MUNDIAL DI OBESIDAD

"Cambia Perspectivanan: Laga Nos Papia Tocante Obesidad y...,"

Awe, 4 di Maart ta Dia Mundial di Obesidad, unda nos ta uni cu mundo hente pa actua ariba e problema aki. E tema aki ta uno di sumo importancia y ta recorda Minister Dangui Oduber pa sigui traha ariba prevencion pa yega na un Aruba saludabel.

Ministerio di Salud hunto cu partners manera DVG-Health Promotions, Plataforma di Saud, Healthy Lifestyle Center, Ibisa, Jump18 y Cool2BFit ta comprometi na enfoca ariba prevencion y e tema di Dia Mundial di Obesidad e aña aki, "Cambia Perspectivanan: Laga Nos Papia Tocante Obesidad y...," ta resona fuertemente cu Minister Dangui Oduber su strategia di cuido preventivo di salud. Dor di stimula combersacionan tocante e tema aki, kita stigma, y desafia conceptonan falso, ta logra e meta di crea un sociedad cu ta compronde tur problema cu ta bin cu obesidad.

Obesidad no ta solamente un lucha personal, pero un reto social unda hunto, sosteniendo otro, nos por logra. Como

Minister di Salud, "mi por garantiza bo cu Ministerio di Salud ta dedica na implementa polisanan cu ta promove estilonan di bida saludabel, cuido di salud alcansebel pa un y tur, y ta encurasha un comunidad cu ta sostene otro den e lucha aki". Ministerio di Salud su enfoke ta riba prevencion, y ta kere cu dor di traha hunto por logra avancenan significativo den e lucha contra obesidad.

Minister Dangui Oduber ta encurasha tur ciudadano pa tin e curashi, pa comparti bo storia y sostene otro ariba e caminda pa un futuro mas saludabel. Hunto como pueblo mester concientisa otro, boga pa un cambio y intercambia conocimiento pa crea un ambiente cu ta stimula e bienestar pa un y tur.

Un sociedad mas saludabel ta cuminsa cu cada un di nos tumando desicionnan conciente pa nos mes salud. Hunto, laga nos traha pa un Aruba unda cuido preventivo di salud no ta solamente un estrategia, pero un manera di biba.







MINISTER

*Geoffrey Wever*

## GEOFFREY WEVER CU "YAMADA DI ACCION" PA DOÑONAN DI PROPIEDAD DEN ORANJESTAD Y SAN NICOLAS CU TA BUSCANDO INVERSION



Minister Geoffrey Wever durante conferencia di prensa dialuna mainta a haci un yamada na tur comerciante y of propietario di edificionan den centronan di ciudad na Oranjestad y San Nicolas pa haci uzo di e oportunidad y participa na e "showcase event" durante di Aruba Investment Summit na Hulanda 21 di Maart proximo.


"Un tempo nan tabata lugarnan yen di actividad - pero e modelo economico cu un tempo tabata sostene San Nicolas y Oranjestad ta rekeri un revision fundamental", segun minister Geoffrey Wever splicando cu "nos mester transforma e areanan den nos centro di ciudad den espacionan vibrante, multifuncional cu ta cater pa vivienda, gastronomia, entretenimento, y otro facilidadnan publico". Pa logra esaki, inversion ta crucial, pa cual e Aruba Investment Summit 2024 na Den Haag ta representa un momento oportuno pa atrae e financiamiento necesario pa supla bida nobo den nos centronan urbano.



Colabora na e Revitalisacion di nos centronan di ciudad  
Si bo ta buscando pa bende of lease bo propiedad, of ta buscando inversionista como co-borrower / partnership, anto bo ta desea di registra of ricibi mas info? Por manda un email na: [info@investinaruba.com](mailto:info@investinaruba.com)

Door di registra bo propiedad den centro di San Nicolas y Oranjestad, abo como propietario ta haya acceso por medio di e summit aki pa expone bo propiedad na mercado mucho mas grandi di potencial inversionistanan Europeo.

Propiedadnan den e centronan di ciudad di San Nicolas y Oranjestad, sea terenonan bashi, structuranan abandona, of espacionan sub-utilisa, ta representa potencial pa explora, pa cual informacion tocante e propiedadnan aki ta importante: nan disponibilidad, condicion, y e interes di nan doñonan pa bende, lease, renoba, of colabora pa establece negoshinan unico dentro di nan edificio.

"Nos ta custumbra di profila nos mes como e destinacion turistico. Awo nos ta bai showcase Aruba na Hulanda como e pais pa haci inversion tambe. E iniciativa aki no ta solamente pa identifica propiedadnan disponibel, pero tambe ta fomenta un dialogo entre doñonan di propiedad y potencial inversionistanan, creando partnershipnan cu lo sirbi como e fundeshi pa revitalisacion di nos centronan di ciudad", minister Wever ta termina. 





## MINISTER ENDY CROES A REUNI CU COMISION FIHO DI DEPORTE DI PARLAMENTO

**A trata e topico di Lotto pa Deporte**



Recientemente, Minister Endy Croes a atende reunion di comision fiho di deporte di Parlamento di Aruba. Presidente di comision fiho di deporte, Sra. Setty Christiaans – Yarzagaray a invita mandatario di Deporte pa elabora y duna informacion actualisa di Lotto pa Deporte. Durante e encuentro, Minister Endy Croes a duna un presentacion amplio di e historia di Lotto pa Deporte desde 1982. Tambe, el a elabora con Lotto pa Deporte ta hinca den otro.

Na 1999, Lotto pa Deporte a bay pa prome bes online via e sistema di Canadian Bank Note (CBN). A repasa e cifranan di e jaarrekening di 2009 pa 2020. Desde 2011, bou di gobierno anterior a cambia e contract cu CBN, unda cu CBN a cuminsa ricibi 23.5% di e benta bruto en bes di 8.25%. Esaki a causa cu deporte a haya hopi menos placa. Manera ta conoci, un team di FLPD a renegocia un contract nobo cu CBN. Desde e prome kwartaal di 2023, e contract ta firma, no a tuma over pa e contract drenta na vigor comokiera cu falta algun rekisito cu ta finalizando, entre otro, jaarrekening di Lotto pa hacie mas al dia. Cu e contract nobo aki ta bolter bek e situacion cu CBNA y CBN Canada, en bes di ricibi 23.5% ta bay bek na 8.25%.



Tambe, Minister Endy Croes a elabora riba e proyectonan deportivo cu ta den “pipeline” cu Lotto pa Deporte lo sostiene. Casi 2 ora di reunion unda cu Minister Endy Croes bay hopi amplio y a contesta tur e preguntanan cu el a ricibi di e parlamentarionan. Por ultimo, e miembronan di parlamento a keda contento cu e desaroyonan nobo y tur informacion cu nan a ricibi al respecto di Lotto pa Deporte y e contract nobo.



# MINISTER ENDY CROES A ELABORA RIBA E CONSTRUCCION DI UN JULIANA SCHOOL NOBO



Recientemente, Minister Endy Croes a reuni cu e comision cu ta atende cu e proyecto di un Juliana School nobo. E comision ta consisti di, entre otro, representante di DOW, DIP, consehero di Ministerio di Enseñansa, consehero di Ministerio di Asuntonan General y Infraestructura y e team di arkitekto cu ta preparando e diseño. Desde aña 2016, e team di Juliana



School a muda pa otro edificio temporalmente, pa motibo cu e scol no tabata den un bon condicion.

Manera ta conoci, Gobierno di Aruba a stipula 6.7 miyon florin pa construi un edificio completamente nobo. Den cuadro di esaki, cada dos siman e comision ta reuni pa mira e avancen di e proyecto pa un Juliana School nobo. Minister Endy Croes a indica cu e proyecto ta canando bon tur stakeholder ta haciendo di nan parti pa cumpli cu tur regla y rekisito.

Minister Endy Croes a expresa cu lo informa Pueblo di Aruba unaves cu ta asina leu cu e destaho publico “aanbesteding” sali y e fecha cu esaki lo cera, pa asina scoge e contratista cu lo ehecuta e construccion di un Juliana School completamente nobo. ■■■





## MINISTER DI LABOR A REUNI CU GREMIONAN COMERCIAL TOCANTE E NECESIDADNAN RIBA MERCADO LABORAL

Diahuebs mainta, Minister di Labor Glenbert Croes a reuni cu Aruba Hotel and Tourism Association (AHATA), Aruba Trade & Industry Association (ATIA), Comerciantenan Uni Aruba (CUA), y Camara di Comercio (KVK). Meta di e reunion tabata pa Comercio vocifera nan preocupacion referente e retonan cu nan ta encontrando riba e mercado laboral y falta di trahado.

Minister Croes a indica cu durante e reunion, nan a discuti riba tur e necesidadnan cu tin actualmente. E mandatario a expresa e boluntad cu ta existi di parti di Gobierno y di Ministerio di Labor en particular pa bin cu solucionnan concreto pa coopera pa soluciona e retonan existente riba mercado laboral. Tambe a pasa riba tur e areanan cu ta den necesidad di trahado inmediato, pero semper respetando e maneho cu e yiunan di tera ta haya prioridad.

E necesidad di trahado riba mercado ta urgente y mester atende cu esaki y haya su debido atencion.

E maneho di Gobierno semper lo duna preferencia na nos hendenan local y unabes cu esey ta cubri lo pasa na busca inmigrantenan cu ta bibando na Aruba cu mester di trabou. Pa cu esaki ministerio di labor lo coopera cu comercio door di haci e proceso di DPL y DIMAS mas eficiente, eficaz y transparente. E escases laboral ta un responsabilidad di nos tur y comercio y gobierno mester traha hunto pa nos logra cumpli cu e demanda laboral.

Pa por yega na solucionnan concreto pa mehoracion den area laboral, a keda palabra cu señora Tisa LaSorte di AHATA y consehero huridico di Ministerio di Labor, Glendeline Croes, lo lidera un "taskforce", na unda lo pone tur e recomendacionnan di tur locual Comercio mester. Esaki lo wordo adapta y adopta como maneho. Unabes cu e proposicion aki ta cla, Gobierno lo ehecut'e, apoyando asina e sector principal di pais Aruba, cu ta turismo.

Minister Glenbert a expresa cu e reunion tabata uno positivo, y a compromete su mes pa traha na bienestar di comunidad di Aruba, mehorado tur aspecto di e mercado laboral. ■■■







## Gabinete Wever-Croes

Murayanan na San Nicolas, cu un tempo tawata silencioso y senciyo, a bira inspiracion pa creatividad dinamico di varios artista. Cada arte di muraya ta un celebracion di diversidad, cultura y union, dunando bida na murayanan y transforma nan den obranan maestro.

# 2024

AÑA DI STABILIDAD Y PROSPERIDAD